

四庫全書

經部

欽定四庫全書

經部

陸氏詩疏廣要卷下之上

詳校官監察御史臣周

通政使司副使臣莫瞻菴覆勘

總校官知縣臣楊懋珩

校對官中書臣孫球

謄錄監生臣沈方大

欽定四庫全書

陸氏詩疏廣要卷下之上

吳陸璣撰

釋鳥

明毛晉廣要

關關雎鳩

雎鳩大小如鳩

一作鳩

深目目上骨露出幽州人謂之鷺

禽經云王雎雎鳩魚鷹也亦曰白鷺亦曰白鷺張華

註云毛詩曰王雎摯而有別多子江表人呼以為魚

鷹雌雄相愛不同居處詩之國風始關雎也爾雅云

雉鳩王雉郭璞註曰鷓鴣類今江東呼之為鷓鴣好在江渚山邊食魚韓詩說雉雄貞潔慎匹以聲相求隱蔽乎無人之處徐鉉蟲魚圖云雉鳩常在河洲之上為儔偶更不移處俗云雉鳩交則雙翔別則立而異處朱子語錄狀如鳩差小而長常是雌雄兩兩相隨不相失然亦不曾相近須隔丈來地陰陽自然變化論雉鳩不再匹淮南子闕雉興于鳥君子美之為其雌雄之不乖居也鹿鳴興于獸君子大之取其見食而

相呼也埤雅云通習水又善捕魚風土記云或說雉
鳩為白鷹白鷹鸛屬于義無取蓋蒼鸛大如白鷹而
色蒼其鳴憂和順又游于水而息于洲常隻不雙鄭
漁仲云雉鳩王雉鳬類多在水邊尾有一點白故揚
雄云白鷹舊說鵬類誤矣嚴華谷云左傳郊子五鳩
備見詩經雉鳩氏司馬此詩是也祝鳩氏司徒鵲鳩
也四牡嘉魚之鵲是也鴈鳩氏司空布穀也曹風之
鴈鳩是也爽鳩氏司寇大明之鷹是也鵲鳩氏司事

鸞鳩也非斑鳩小宛之鳴鳩與氓食桑葚之鳩是也
按爾雅釋鳥又云揚鳥白鸞是與睢鳩同類而異種
者也不知揚雄許慎何皆曰白鸞范鄭諸家辨之甚
詳或謂王睢睢鳩是二鳥則與經傳相乖余未敢遽
信

黃鳥于飛

黃鳥黃鸝也或謂之黃栗留幽州人謂之黃鸝或謂
之黃鳥一名倉庚一名商庚一名鷦黃一名楚雀齊人

謂之搏黍關西謂之黃鳥一作鸛黃當甚熟時來在桑間故里語曰黃栗留看我麥黃甚熟不亦是應節趨時之鳥也或謂之黃袍

爾雅皇黃鳥又云倉庚商庚又云鸛黃楚雀又云倉庚鸛黃也郭註云俗呼黃離留亦名搏黍其色鸛黑而黃因以名云鄭註云黃鸛也一名倉庚一名商庚一名鸛黃一名楚雀一名搏黍一名黃離留陸璣云常以甚熟時來故里語曰黃栗留看我麥黃甚熟不

故又名黃栗留禽經倉鷓鴣黃黃鳥也亦曰楚雀亦
曰商庚夏蠶候也張註今謂之黃鶯黃鸝是也野民
曰黃栗留語聲轉耳其色鵪黑而黃故名鵪黃詩云
黃鳥以色呼也北人呼為楚雀此鳥鳴時蠶事方興
蠶婦以為候說文離黃倉庚也鳴則蠶生禮記曰仲
春之月倉庚鳴格物總論云鵪黑尾嘴尖紅脚青遍
身甘草黃色羽及尾有黑毛相間三四月鳴聲音圓
滑埤雅倉庚鳴于仲春其羽之鮮明在夏韓子曰以

鳥鳴春以蟲鳴秋以鳥鳴春若黃鳥之類其善鳴者
也爾雅翼倉庚黃鳥而黑章齊人謂之搏黍秦人謂
之黃流離幽冀謂之黃鳥一名黃鸝留或謂之黃栗
流一名黃鸝二月而鳴夏小正云二月有鳴倉庚鸝
者績之候倉庚者蠶之候詩鳥鳴嚶嚶按禽經稱鸝
鳴嚶嚶則詩所言鳥殆謂此故後人皆以鸝名之此
鳥之性好雙飛故鸝字從麗又曰鸝必匹飛鸝必單
棲出谷遷喬之事未見其驗今荊州每至冬月於田

畝中得土堅圓如卵者輒取以賣破之則鷓在其中
無復毛羽蓋以土自裹伏而土堅勁候春始生羽破
土而出然則出谷遷喬之事恐當似此矣

流離之子

流離臬也自闕而西謂臬為流離其子適長大還食其
母故張奐云鷓鴣食母許慎云臬不孝鳥是也

爾雅鳥少美長醜為鷓鴣邢疏鳥之少為子者美長
食母而醜其名為鷓鴣郭云鷓鴣猶留離謂之子者

按詩邶風云碩兮尾兮流離之子是也流與鷦同詩
攷亦作留離之子鄭註云鷦鷯猶流離也禽經梟鷽
害母張註梟在巢母哺之羽翼成啄母自翔去也毛
傳流離鳥也少好長醜正義曰流與鷽蓋古今之字
爾雅離或作栗埤雅北山錄曰烏反哺梟反噬蓋逆
順之習也聽聲考詳篇云鶴聲宜學仙雉聲宜習武
鳥聲宜習鴈聲宜習卜筮鵲聲宜習工巧梟聲宜
習符呪西方之書曰如土梟等附塊為兒名之曰土

梟蓋取諸此傳曰甑瓦可以令梟寂又曰梟避星名
鵲違歲子爾雅翼劉子曰炎州有鳥其名曰梟偃伏其
子百日而長羽翼既成食母而飛蓋稍長從母索食
母無以應於是而死古者天子常以春解祠祠黃帝
用梟破獍梟不孝之鳥破獍食父之獸黃帝欲絕其
類使百吏祠皆用之至漢武時亦令祠官領之如其
方而漢使東郡送梟五月五日作梟羹以賜百官淮
南子鼓造辟兵壽盡五月之望許叔重曰鼓造蓋謂

梟一曰蝦蟆今世人五月作梟羹亦作蝦蟆羹是食
梟之驗也博之采有梟者博兼行惡道故以梟為采
亦梟得之僞故猛將謂之梟將也土梟穴土以居故
曰土梟而荆楚歲時記稱鵯鵯為土梟說者乃因謂
鸛鵒來巢者又云鸛鵒穴居誤矣梟今人養以致鳥
後漢五行志稱衆鳥之性見非常斑駁好聚觀之至
於小爵希見梟者暴見尤聚

弋鳧與雁

鳧大小如鴨青色卑脚短喙水鳥之謹愿者也

鳧爾雅云鴈沈鳧郭註云似鴨而小長尾背上有文
今江東呼為鴈鄭註云似鵞而小尾白俗呼水鵞好
沒故曰沈鳧禽經曰鳧鵞之雜張註鳧鵞鴨屬色不
純正故曰雜矣埤雅云鳧雁常以晨飛故雞鳴篇云
弋鳧與雁賦曰晨鳧旦至此之謂也卜居云將泛泛
若水中之鳧與波上下偷以全吾軀乎蓋沈鳧善沒
而又容與與波上下故管之散人慕焉莊子曰鳧脰

雖短續之則憂鶴脰雖長斷之則悲博雅云鳧鶩臺

古鴨字

也爾雅翼云唐陸龜蒙稱冬十月視獲于甫田

夜間往往聞有聲類暴雨而疾至者一夕凡數四明
訊其眈曰鳧鶩也其曹蔽天而來蓋當田之禾必竭
其穗而後去江之南不能弋羅常藥而得之糠粃塗
枝叢植于陂一中千萬膠而不飛然則江東蓋未嘗
弋也然聞今江南大陂湖中其誘鳧者亦皆以網植
兩表於水相去甚近中網焉以舟自前驅而逐之率

一獲千百輩則又與龜蒙說異矣鳧所在必賊梁食古之人亦養之鄒穆公有令食鳧雁必以粃無得以粟於是倉無粃而求易於民二石粟而得一石粃故郭氏解方言稱江東有小鳧其多無數俗謂之冠鳧善飛王充論衡曰日月一日一夜行二萬六千里與鳧飛相類故王喬以上方所賜舄假形于鳧自葉朝京師焉吳地志曰石首魚至秋化為冠鳧鳧頭中有石也方言曰野鳧甚小而好沒水中者南楚之外謂

之鴈鵠說苑魏文侯嗜晨鳧南越志有松鳧棲息松
間周書王會鳧羽為旌漢飲飛在上苑中結繒繳弋
鳧雁歲萬頭

雁夏小正云正月雁北鄉鄉者何也鄉其居也九月
遯鴻雁遯往也猶曰傳其驛舍云爾非其居也禽經
云雁一名翁雞一名鴻鵠一名鷹又云鵠以水言自
北而南鴈以山言自南而北張華註云鵠音雁隨陽
鳥也冬適南方集于江干之上故字從干鴈亦音雁

中春寒盡雁始北嚮燕代尚寒猶集于山陸岸谷之

間故字從扌博雅云鳴

音加一音哥

鵠倉鳴鴈

古雁字

也方

言云自關而西謂之鳴鵠南楚之外謂之鵠或謂之

鵠鳴埤雅云周禮曰雁宜麥又六摯大夫執雁以知

保身又欲有去就之義而不失其常故執雁也雁夜

泊洲渚令雁奴圍而警察飛則銜蘆而翔以避繒繳

有遠害之道非特取其有去就之義而已雁行斜步

側身故莊子謂士成綺雁行避影而問老子一名朱

鳥法言曰能來能往者朱鳥之謂歟本草唐本註云
雁為陽鳥冬則南翔夏則北徂時當春夏則孳育于
北與燕相反燕來則雁往燕往則雁來故禮云秋鴻
雁來春玄鳥至衍義曰雁人多不食者謂其知陰陽
之升降分長少之行序世或謂之天厭亦道家之一
說爾唐註云雁為陽鳥其義未盡茲蓋得中和之氣
熱則即北寒則即南以就和氣所以為禮幣者一取
其信一取其和昏禮云下達納采用雁執雁請問名

納吉用雁請期用雁又云摯不用死故詩曰雍雍鳴
雁言用生者也古今註云雁自河北渡江瘦瘠能高
飛不畏縉緄江南饒沃每至還河北體肥不能高飛
嘗銜蘆長數寸以防護周書曰白露之日鴻雁來鴻
雁不來遠人背畔小寒之日雁北鄉雁不北鄉民不
懷至物類相感志云大曰鴻小曰雁夜宿洲中鴻在
內雁在外逐更警避備狐與人之捕已山海經云雁
門山雁出其間在高柳北舊說鴻雁南翔不過衡山

今衡山之旁有峰曰回雁蓋南地極燠人罕識雪者
故雁望衡山而止爾雅翼雁鴻雁乃一物爾初無其
別至詩註乃云大曰鴻小曰雁雁曷為有小者按淮
南鴻烈云雁乃兩來仲秋鴻雁來季秋候雁來候雁
比于鴻雁而小故說詩推雁為鴻雁而別以此為雁
也今北方有白雁似鴻而小色白秋深乃來來則霜
降河北為之霜信蓋曰霜降五日而鴻雁來寒露五
日而候雁來候雁之來在霜降前十日所以謂之霜

信也古者執贄雖用鴻雁然當亦通用此小者故春秋曹伯陽好田弋曹鄙人公孫疆獲白雁獻之漢武帝太子昏得白雁于上林以為贄即此物也今月令及周書乃不復有鴻雁候雁之別月令則云八月鴻雁來九月鴻雁來賓周書則曰白露之日鴻雁來寒露之日又來既是一種何得前後不齊如此似不應耳許叔重註二雁則以為仲秋時候之雁從北漢中來過周雒南去至彭蠡季秋時候之雁從北漢中來

南之彭蠡以為八月來者其父母也是月來者蓋其子也羽翼穉弱故在後耳而賓字讀屬下句謂之賓雀不取來賓之義今淮南子乃竝作候雁此當有所據詩緝曹氏曰鴻雁之趾連蹄不能握木故易以鴻漸于木為失所不安之象書以彭蠡既豬陽鳥攸居為得其所爾雅云鳬雁醜其足蹠其踵企邢疏云鳬水鳥也雁陽鳥也蹠猶蹠屬相著之謂也踵脚跟也鳬雁之類脚指間有幕蹠屬相著飛則伸其脚跟企

直也埤雅云弱弓微矢乘風振之曰弋故楚人好以弱弓微矢加之歸雁之上

按鴻雁非二物羅氏辯之甚悉元恪豈亦以為然故前篇釋鴻此篇止釋鳬不又釋雁耶但云純白似鶴似別一種意即所謂霜信杜子美詩云故國霜前白雁來者是也若據今白露南翔之雁其色俱竊玄竊黃與鵝相似從無白者攷之諸儒傳疏頗合因詳錄以備考

肅肅鵠羽

鵠鳥似雁而虎文連蹄性不樹止樹止則為苦故以喻君子從征役為危苦也

埤雅郭璞曰鵠似雁無後指毛有豹文一名獨豹易林曰文山鴻豹肥腠多脂蓋言此也閩諺曰鵠無舌免無脾段氏云鵠鵠亦鵠爾雅翼鵠者今之獨豹也以鵠為豹聲之訛耳鵠亦水鳥似雁而無後指上林賦曰鴻鵠鵠鵠駕鵠屬玉交精旋目煩驚庸渠箴疵

鵠盧羣浮乎其上是也鵠羽之詩言君子下從征役
不得養其父母以喻鵠之集于苞栩苞棘苞桑蓋水
鳥而木棲既失其常又無後指尤非托于木者可謂
不得其所矣段成式云鵠遇鷺鳥能激糞禦之糞著
毛悉脫今鵠之毛能落衆羽然其鷺烈足以服羽族
此類之可推者鵠乃水鳥不以執稱而鷺鳥為之落
羽此類之不可推者朱子曰鵠似雁而大無後趾陳
氏曰其羽急疾孔氏曰鵠羽連蹄樹立則為苦禮曰

雞肝雁腎鵠與鹿胃鄭玄云與脾也說文曰鵠相次也從匕從十蓋鵠性羣居如雁自然有行列故從𠂔詩故曰鵠行

鵠彼飛隼

隼鷃屬也齊人謂之擊擊一作鷃或謂之題肩一作眉或謂

之雀鷹春化為布穀者是也此屬數種皆為隼

爾雅云鷹隼醜其飛也郭註云鼓翅翬然疾鄭

註云翬猶揮也謂鼓翅揮疾韋昭云隼今之鷃李善

云鷺擊之鳥通呼曰隼禽經云鷹好峙隼好翔鳬好
沒鷗好浮又云鳥之小而鷺者皆曰隼大而鷺者皆
曰鳩又云鷹以膺之鵠以捐之隼以尹之埤雅云鷹
之搏噬不能無失獨隼為有準故于文從水從隼司
常曰鳥隼為旗蓋鳥鳳也畫鳳以象其德畫隼以象
其威化書曰鳥反哺仁也隼憫胎義也蓋隼之擊物
遇懷胎者輒釋不戮也考異郵云陰陽氣貪故題肩
擊宋均云題肩有爪芒為陰中陽故擊殺之

按月令仲春之節鷹化為鳩仲秋之節鳩復化為鷹
列子云鷦之為鷽鷽之為布穀布穀久復為鷽淮南
子曰鷽化為鷽鷽化為布穀布穀復為鷽據此疏又
云隼化為布穀可見鷽隼鷽鷽鳩鷽布穀晨風諸鳥
總順節令以變形故爾雅曰屬曰醜

值其鷽羽

坊刻振鷽
于飛誤

鷽水鳥也好而潔白故汶陽謂之白鳥齊魯之間謂之
春鉏遼東樂浪吳揚人皆謂之白鷽大小如鷽青脚高

尺七八寸尾如鷹尾喙長三寸頭上有毛十數枚長尺餘毵毵然與衆毛異甚好將欲取魚時則弭之今吳人亦養焉好羣飛鳴楚威王時有朱鷺合沓飛翔而來舞則復有赤者舊鼓吹朱鷺曲是也然則鳥名白鷺赤者少耳此舞所持持其白羽也

爾雅鷺春鉏邢疏云鷺一名春鉏郭云白鷺也頭翅背上皆有長翰毛今江東人取以為睫櫛名之曰白鷺縵詩陳風云值其鷺羽鄭註云亦曰鷺鷥禽經云

鵬鷺之潔又云窠窠雖雖鴻儀鷺序張註鷺白鷺也
小不踰大飛有次序百官縉紳之象詩以振鷺比百
寮雍容喻朝美埤雅鷺步于淺水好自低昂故曰春
鋤也鷺色雪白頂上有絲毵毵然長尺餘欲取魚則
弭之禽經曰鷺啄則絲偃鷹捕則角弭藏殺機也青
脚喜翹高尺七八寸善蹙捕魚又其翔集必舞而後
下每至水面數尺則必低曲少盤其勢與飛之時徑
起特異蓋其天性舞而後下故詩於鷺于下曰醉言

舞鷺于飛曰醉言歸也禽經曰鷺好霜鷺好露字從
露省以此亦或謂之白露今人畜之極有馴擾者每
至白露降日則定飛揚而去俗說雄雌相盼則產陰
陽自然變化論曰鷺目成而受胎鶴影接而懷卵鷺
鷺交頸野鵲傳枝物固有是哉鷺白鳥也故詩言白
鳥鷺鷺以美文王之德爾雅翼云鷺水鳥潔白而善
為容江東人取毛為接羅名白鷺縑亦曰白鷺縑或
以紅鶴毛間之隋樂志云建鼓商世所作又棲翔鷺

于其上不知何代所加或曰鵠也取其聲揚而遠聞
或曰白鷺鼓精也或曰皆非也振振鷺鷺于飛鼓咽
咽醉言歸言古之君子悲周道之衰頌聲之息飾鼓
以鷺存其風流未知孰是隋志之說云爾考按梓人
之職羸者羽者鱗者以為筍簾蓋振古如此則所謂
建鼓之鷺安知非商世所有陳風亦曰坎其擊鼓宛
丘之下無冬無夏值其鷺羽坎其擊缶宛丘之道無
冬無夏值其鷺翩翩或為纛羽為翽皆筍簾之所懸

則鼓之上有鷺舊矣說詩者乃以鷺為舞者之翳而訓值為持不知值者蓋植立之義又曰振鷺于飛于彼西雝大雅論鐘鼓必於辟雝之地春秋傳則云西辟樂備是辟雝西辟西雝皆樂器之所在也大射儀建鼓在阼階西南書亦云大貝鼗鼓在西房則西雝振鷺之飛為鼓上之鷺明矣鼓常在西振鷺在鼓之上有飛之象耳又說者以鷺為鼓精古今樂錄云吳王夫差時有雙鷺飛出鼓中而大雲故有是名猶會

稽雷門之鼓相傳有鶴飛入其中鼓鳴聞洛陽後破
鼓鶴遂飛去亦其類也後世有鼓吹曲亦以朱鷺為
首或言朱鷺是漢曲說樂府者亦以為因飾鼓以鷺
而為曲之名此則非也飾鼓以鷺而不朱朱自因瑞
耳禽經曰朱鷺不攫肉朱鷺不吞鯉

按鷺一名屬玉屬玉乃是水鳥漢武以之名觀云可
以厭火恐亦非鷺姑存疑以俟博識者

維鷗在梁

鵜水鳥形如鷄而極大喙長尺餘直而廣口中正赤頷
下胡大如數升囊好羣飛若小澤中有魚便羣共捋水
滿其胡而棄之令水竭盡魚在陸地乃共食之故曰淘
河

爾雅鵜鵜郭註今之鵜鵜也好羣飛沈水食魚故
名洿澤俗呼之為淘河禽經曰淘河在岸則魚沒沸
河在岸則魚出又云鵜志在水鴈志在木張註鵜鵜
水鳥也似鵜而大喙長尺餘頷下有胡如大囊受數

升湖中取水以聚羣魚候其竭涸奄取食之一名淘
河詩曰維鵜在梁志在水也本草鵜鵠鳥如蒼鵠頤
下有皮袋容一二升物展縮由袋中盛水以養魚一
名淘河身是水沫唯胸前有兩塊肉如拳云晉為人
竊肉入河化為此鳥今猶有肉因名淘河鄭云鵜鵠
味喙也言愛其背埤雅淮南子云鵜鵠飲水數斗而
不足鰓鰓入口若露而死蓋魚生水中而口不納水
也莊子曰魚不畏網而畏鵜鵠言鵜以智力取魚故

魚不畏網而畏之也詩曰維鵜在梁不濡其翼維鵜
在梁不濡其味蓋鵜性羣飛沈水食魚若遇小澤有
魚便各以胡去水令水竭魚露乃共食之故號淘河
洿澤則濡其味翼宜矣今反取飽于梁不濡其翼非
特不濡其翼且又不濡其味故詩以刺小人不食其
力無功而受祿也山海經云憲期之山多鵜鵠如鴛
鴦而人足其鳴自呼前漢志鵜鵠集昌邑王殿下劉
向以為水鳥色青青祥也

鴈鳩在桑

鴈鳩鵲鳩今梁宋之間謂布穀為鵲鳩一名擊穀一名桑鳩按鴈鳩有均一之德飼其子旦從上而下算從下而上平均如一

禽經云鴈鳩戴勝布穀也亦曰鵲鳩亦曰獲穀春耕候也張華註揚雄曰鴈鳩戴勝生樹穴中不巢生爾雅曰鵲鳩戴勝即首上勝也頭上尾起故曰戴勝而農事方起此鳥飛鳴于桑間云五穀可布種也故

曰布穀月令曰戴勝降于桑一名桑鳩仲春鷹所化也此鳥鳴時耕事方作農人以為候爾雅云鴈鳩鵠鵠郭註云今之布穀也江東呼為獲穀邢疏云左傳鴈鳩氏司空也詩召南維鵲有巢維鳩居之皆謂此也埤蒼云鵠鵠方言云戴勝謝氏云布穀類也按戴勝自生穴中不巢生而方言云戴勝非也鄭註云即布穀也一名桑鳩一名擊穀江東呼為獲穀禮記謂之鳴鳩埤雅云鴈鳩結鞠一名搏黍今之布穀江東

呼為郭公不自為巢居鵲之成巢周官羅氏中春獻
鳩以養國老者鳩性不噎食之且復助氣故也續禮
儀志曰仲秋按戶校年老者授之以杖其端刻鳩形
鳩者不噎之鳥也禽經一鳥曰佳二鳥曰雛三鳥曰
朋四鳥曰乘五鳥曰雇六鳥曰鵠七鳥曰鵠八鳥曰
鸞九鳥曰鳩十鳥曰鵠鳩字從九以此馮衍逐婦書
曰口如布穀言其多聲也爾雅翼云鵠鳩又呼撥穀
似鷄長尾牝牡飛鳴翼相摩拂月令云鳴鳩拂其羽

是也取其骨佩之宜夫婦夏小正云正月鷹則為鳩
五月鳩為鷹月令仲春鷹化為鳩其目猶如鷹許叔
重曰鷹化為鳩喙正直不鵞搏也一說鳩蓋一巢而
九鳥者詩曰鵲鳩在桑其子七兮又曰鷦鷯布穀好
鳴之鳥故謂之鳴鳩月令所謂鳴鳩拂羽者今布穀
為然小宛之詩曰宛彼鳴鳩翰飛戾天今鳩四時有
子鳩每月有子

按爾雅釋鳥又云鷽鷽戴鷽郭璞云今亦呼為戴勝

李巡云戴勝一名鷓鴣明乎戴勝非鷓鴣矣不知禽經何無分別邢昺辯之甚詳但邢氏謂與鵲巢之鳩同而歐陽氏又謂別是一種豈更有所據耶至李氏以為鷓鴣嚴氏以為擊正其謬甚矣

鷓鴣鷓鴣

鷓鴣似黃雀而小其喙尖如錐取茅莠為巢以麻紮之如刺襪然縣著樹枝或一房或二房幽州人謂之鷓鴣或曰巧婦或曰女匠關東謂之工雀或謂之過羸關西

謂之桑飛或謂之襪雀或曰巧女

爾雅鵠鵠鵠鵠邢疏舍人曰鵠鵠一名鵠鵠郭云鵠
類詩豳風云鵠鵠毛傳云鵠鵠鵠鵠先儒皆以為今
之巧婦郭註此云鵠類又註方言云鵠鵠鵠鵠鵠屬
非此小雀明矣是與先儒意異也今爾雅以郭氏為
宗且依郭氏埤雅先儒以為鵠鵠即今巧婦郭註爾
雅獨云鵠類則璞與先儒異意以詩與爾雅考之宜
如璞義蓋爾雅言鵠鵠鵠鵠繼云狂茅鵠怪鵠梟鵠

則鴟鴞宜亦鴟類賈誼所謂鸞鳳伏竄鴟鴞翔翔是也詩曰鴟鴞鴟鴞既取我子無毀我室則其語似戒鴟鴞之詞正如黃鳥之詩非鴟鴞自道也晉賢云鴟鴞惜功愛子及室誤矣其二章曰迨天之未陰雨徹彼桑土綢繆牖戶迨天之未陰雨及其閒暇之譬也徹彼桑土綢繆牖戶明其政刑之譬也孔子曰為此詩者其知道乎及其國家閒暇明其政刑孰敢侮之為是故也東萊呂氏曰鸛鳩鴟鴞之別名郭景純陸

農師所解皆得之方言云自關而東謂桑飛曰鷦鷯
此乃陸璣疏所謂巧婦似黃雀而小其名偶與鷽鷽
之別名同與爾雅之所載實兩物也毛鄭誤指以解
詩歐陽氏雖知其失乃併與爾雅非之蓋未攷郭景
純之註耳朱註云鷽鷽鷽鷽惡鳥攫鳥子而食者也
藍田呂氏曰惡聲之鷽鳥也有鷽萃止翩彼飛鷽為
臬為鷽蓋臬之類也華谷嚴氏曰鷽鷽喜破鳥巢而
食其子山陰陸氏曰鷽鷽一名隻狐鷽服鬼車之類

爾雅又云鵯鵯註今江東呼為鵯鵯為鵯欺亦謂之鵯鵯又云怪鵯註即鵯鵯也見廣雅今江東通呼此屬為怪鳥莊子云鵯鵯夜撮蚤察毫末晝出瞑目不見丘山言殊性也博物志云鵯鵯一名鵯鵯晝日無見夜則目至明人截爪甲棄露地此鳥夜至人家拾取爪視之則知吉凶輒便鳴其家有殃本草云鵯鵯入城城空入宅宅空怪鳥也又有鵯鵯亦是其類微小而黃夜能食人手爪知人吉凶纂文曰鵯鵯夜

能食蚤蝨蚤爪音相近俗人云拾人棄爪相吉凶妄說也淮南萬畢術曰鵯鵯致鳥取鵯鵯折其大羽絆其兩足以為媒張羅其傍則鳥聚矣歐陽氏云今鵯多攫鳥子而食名物疏云鵯鵯名鵯鵯巧婦亦名鵯鵯故先儒多誤以鵯鵯為巧婦其實鵯鵯是鵯類耳衛風流離之子此土梟也陳風有鵯萃止此爾雅之梟鵯也竝非此鵯鵯朱傳以為鵯鵯則又誤鵯鵯爾雅謂之鵯鵯又云怪鵯不得為鵯鵯也若巧婦乃

周頌之桃蟲耳據本草則鷦鷯鷽鷽又是二物及鄭氏云鷽鷽生題肩與鷽亦無所出難以管見定其然否韓詩說云鷽鷽鷽鳥名也鷽鷽所以愛養其子者適以病之愛憐養其子者謂堅固其窠巢病之者謂不知託於大樹茂枝反敷之葦蒿風至蒿折有子則死有卵則破是其病也與荀子所說蒙鳩同楊倞荀子註云蒙鳩鷽鷽也是韓嬰亦以鷽鷽為巧婦也按經云既取我子無毀我室雖云比擬之詞其為惡

鳥無疑矣嚴華谷云喜破鳥巢而食其子朱晦菴云
攫鳥子而食極合風人之旨陸元恪認為巧婦釋文
全非大凡說詩者鳥獸草木之名固應詳覈亦必得
顧母法方解人頤若夫流離之子顯然借惡鳥以斥
衛人朱子云流離漂散也謂之何哉

鸛鳴于垤

鸛鸛雀也似鴻而大長頸赤喙白身黑尾翅樹上作巢
大如車輪卵如三升杯望見人按其子令伏徑舍去一

名負釜一名黑尻一名背竈一名阜裙又泥其巢一傍
為池含水滿之取魚置池中稍稍以食其雛若殺其子
則一村致旱災

禽經云鵲仰鳴則晴俯鳴則陰廣雅云背竈阜帔鵲
雀也韓詩章句曰鵲水鳥巢居知風穴處知雨天將
雨而蟻出壅土鵲鳥見之長鳴而喜本草衍義云鵲
頭無丹項無烏帶身如鶴者是兼不善唳但以喙相
擊而鳴多在樓殿上作窠雜俎云江淮謂羣鵲旋飛

為鶴井鶴亦好羣飛陳藏器云人採巢取其子六十
里早能羣飛薄霄激雲雲散雨歇其巢中以泥為池
含水滿中養魚及蛇以哺其子自然論云鶴影接而
懷卵禽經云覆卵則鶴入水張註云鶴水鳥也伏卵
時數入水冷則不鵬取礬石周卵以助暖氣故方術
家以鶴巢中礬石為真物也埤雅云鶴形狀略如鶴
每遇巨石知其下有蛇即於石前如術士禹步其石
昉然而轉南方里人學其法者伺其養雛緣木以蔑

絙縛其巢鸛必作法解之乃於木下鋪沙印其足迹而倣學之又泥其巢一傍為池以石宿水今人謂之鸛石飛則將之取魚置池中稍稍以飼其雛俗說鸛梁蔽形鸛石歸酒又曰礬石溫鸛石涼故能卵不暇水不臭腐也拾遺記曰鸛能聚水巢上故人多聚鸛鳥以攘却火災爾雅翼云鸛生三子一為鶴鳩生三子一為鸛言萬物之相變也易之中孚九二鳴鶴在陰上九翰音登于天說者以為鸛者別於鶴也震為

鶴陽鳥也。鶩為鶴陰鳥也。鶴感於陽，故知夜半鶩感於陰，故知風雨。鶩生鶴者，異極成震，極陰生陽之謂也。今人通呼鶩為鶴，鶴。

按詩攷異字云：鶩鳴于埵。說文云：小爵也。想即爾雅所謂鶩鶩鶩也。郭圖讚云：鶩鶩之鶩，一名墮羿。應弦銜鏑，矢不著地。逢蒙縮手，養由不睨。此鳥捷勁，異常。與本章意義不合。不知伯厚何據。

鴻飛遵渚

鴻鵠羽毛光澤純白似鶴而大長頸肉美如雁又有小
鴻大小如鳬色亦白今人直謂鴻也

易曰漸初六鴻漸于干六二鴻漸于磐九三鴻漸于
陸六四鴻漸于木九五鴻漸于陵上九鴻漸于陸禮
曰前有車騎則載飛鴻飛鴻則有行列故也載謂合
剝皮毛舉之竿首若所謂以鴻脰韜枉者禽經鴻儀
鷺序張註鴻雁屬大曰鴻小曰雁飛有行列也聖人
皆以鴻鷺之羣擬官師也又云鴻雁愛力遇風迅舉

孔雀愛毛遇雨高止揚子云鴻飛冥冥弋人何慕焉
尸子云鴻鵠之翮羽翼未合而有四海之心陳琳曰
陸陷蘄犀水截輕鴻輕鴻鴻毛也傳曰輕于鴻毛今
人試刀劍令髮浮轉於水以刀斷之觀其銛鈍水截
輕鴻殆類是也博物志曰鴻毛為囊可以渡江不漏
又云鴻鵠千歲者皆胎產鴻雁大略相類以中秋來
賓一同也鳴如家鵠二同也進有漸飛有序三同也
雁色蒼而鴻色白一異也雁多羣而鴻寡侶二異也

毛有粗細形有大小埤雅詩曰鴻飛遵渚公歸無所
於女信處鴻飛遵陸公歸不復於女信宿蓋鴻之為
物也其進也有漸其飛有序又其羽可用為儀君子
之道也故此以況周公易曰漸之進也公歸東都則
之進也然未至西都故為不復易曰其羽可用為儀
吉不可亂也鄭箋云鴻大鳥也不宜與鳬鷺之屬飛
而循渚以喻周公今與凡人處東都之邑失其所也
按鵠小鳥也射者設之以命中鳥小而飛疾故射難

中是以中之為儁似非鴻類或云鵠即是鶴意陸璣所見略同但云鴻肉美如雁似與雁非一物

翩翩者鷖

鷖其今小鷖也一名鷖鷖幽州人或謂之鷖鷖梁宋之間謂之鷖揚州人亦然

爾雅云佳其鷖鷖邢疏云舍人曰鷖一名鷖鷖李巡曰今楚鷖也某氏引春秋云祝鷖氏司徒祝鷖即鷖其鷖鷖者故為司徒也郭云今鷖鷖詩曰翩翩者鷖

又毛傳云雛夫不也一宿之鳥鄭箋云一宿者一意
于所宿之木又云鳥之謹慤者人皆愛之此是謹慤
孝順之鳥也鄭註云亦曰祝鳩今所謂鷦鷯也謹愿
之鳥其指之之辭鳥之短尾者皆謂之佳唯夫不專
名焉故指佳為夫不也廣雅云鷽鷽鳩也鷽鷽鷽鳩
辟鷽鷽鷽鷽也埤雅云雛今鷽鷽一名荊鷽一名
楚鷽一名鷽鷽一名乳鷽一名鷽鷽一名鷽鷽一名
鷽鷽方言曰鷽自關而西秦漢之間謂之鷽鷽其大

者謂之鳩鳩其小者謂之鵯鳩或謂之鷦鳩或謂之
鷽鳩梁宋之間謂之鵯鳩性慈孝慈謹故聽聲考
詳篇曰雀聲慘毒鳩聲慈念一曰祝鳩或曰鷽與鷽
鳩皆壹鳥也故有尸祝之號尸鳩性壹而慈祝鳩性
壹而孝故一名尸一名祝今鷽類賦尾皆促故其字
從佳說文曰佳鳥之短尾總名也禽經曰拙者莫如
鳩巧者莫如鷽爾雅翼云佳鳩孝鳥故少皞氏以為
司徒一名祝鳩又名鷽鳩似斑鳩而臆無繡采又頭

有贅物之拙者不能為巢纔架數枝往往破卵無巢
不能居天將雨則逐其雌霽則呼而反之今人辨其
聲以為無屋住云鵲既孝鳥故養老之杖倣之漢仲
秋之月縣道皆按戶比民年始七十者授之以玉杖
杖長尺端以鵲鳥為飾王子年記少皞時事稱帝子
與皇娥泛于海上以桂枝為表結薰茅為旌刻玉為
鳩置于表端則鳩杖之起亦遠矣琴操曰舜耕歷山
思慕父母見鳩與母俱飛鳴相哺食感恩作歌今之

青鵠禽經曰鵠上無尋鵠上無常言二鳥之起不過
尋丈歲時記稱四月有鳥如烏鴻先雞而鳴聲云加
格加格民侯此鳥鳴則入田以為催人犁格也亦一
引爾雅烏鵠即鵠鳩并摯虞槐賦春宿教農之鵠鳩
與鳬異又以為春鳬曰鵠鵠主五土宜于水者也則
誤矣淮南亦云孟夏之日以熟穀禾鵠鳩長鳴為帝
侯歲蓋亦謂此許叔重以為鵠鳩布穀未知孰是詩
緝曰雛鵠鳩也即郊子祝鵠氏司徒也雛一鳥而十

四名雛也佳其也鶉鳩也祝鳩也鵒鳩也鶉鳩也鶉
鳩也鶉鳩也楚鳩也鳩鳩也荆鳩也鶉鳩也鶉鳩也
鶉鳩也左傳杜預註曰祝鳩孝故主於教民

按鳩類甚多其名亦紛紛不一如鶉鳩鵒鳩鶉鳩鵒青
鶉鶉鶉鶉鶉鶉之類不可枚舉何嚴氏止云十四名耶
但張揖云佳鶉也惑人甚矣若斑鳩據張華禽經註
云斑次序也凡哺子朝從上下暮從下上他鳥皆否
其為鶉鳩無疑矣管人但能辨鳴鳩非斑鳩不能辨

斑鳩是鳩鳩皆泥斑文之斑而不知班列之班也凡
鳩皆好鳴故馮衍逐婦書云口如布穀羅氏遂混鳩
鳩鳴鳩為一鳥與陸氏分疏之意甚相矛盾

脊令在原

脊令大如鷦鷯長脚長尾尖喙背上青灰色腹下白頸
下黑如連錢故杜陽人謂之連錢

禽經曰鵙鵙友悌張註雀屬也爾雅曰鵙鵙雛渠毛
詩曰水鳥也大雀高尺尖尾長喙頸黑青灰色腹下

正白飛則鳴行則搖又曰鵲鵲在原兄弟急難鵲鵲
共母者飛鳴不相離詩人取以喻兄弟相友之道也
博雅鵲鵲音形也埤雅云義訓曰鵲鵲錢母其頸如
錢文其鳴自呼或曰首尾相應飛且鳴者故謂之鵲
渠渠之言勤也物類相感志曰俗呼雪姑其色蒼白
似雪鳴則天當大雪極為驗矣爾雅翼鵲鵲水鳥唐
明皇時有鵲鵲數十集麟德殿廷木翔棲浹日魏光
乘作頌以為天子友悌之祥詩緝云脊令飛則鳴行

則搖在原作者是其行時也非在原不見其行故以在原言之脊令行而在原則搖其身首尾相應如兄弟急難相救也世以手足喻兄弟亦謂如左右手之相救一體同氣天性自然至親至切之喻也小宛取義在於飛則鳴故曰題彼脊令載飛載鳴此詩取義在於行則搖故曰鵲鵲在原則子以為脊令首尾相應是也鄭氏以為水鳥宜在水中在原則失其常處故飛鳴以求其類非也今雪姑非水中之鳥若失其常

處而飛鳴以求其類凡鳥皆然何獨脊令哉

按詩攷作鵲鵲在原惟石經作脊令今江南洲渚間多有之其狀小如雀輕俊可愛張茂先云高尺恐誤

歎彼晨風

晨風一名鷗似鷗青黃色燕含鉤喙嚮風搖翅乃因風飛急疾擊鳩鵲燕雀食之

爾雅云晨風鷗邢疏云舍人曰晨風一名鷗擊鳥也郭云鷗屬鄭云似鷗而小禽經云鷗曰鷗張註云晨

風也向風搖翅其回迅疾狀類雞色青搏燕雀食之
左傳云若鷹鷂之逐鳥雀列子曰鷂之為鷂鷂之為
布穀布穀久復為鷂也孟子所謂為叢毆爵者鷂禽
經曰鷂好風鷂惡雨然則謂之晨風可知也已又曰
鷂鷂之信不如雁周周之智不如鴻今鷂亦去來有
時字从亶又可知矣

鶴鳴于九臯

鶴形狀大如鵝長脚青黑高三尺餘赤頂赤目喙長四

寸餘多純白亦有蒼色蒼色者人謂之赤頰常夜半鳴
淮南子亦云雞知將旦鶴知夜半其鳴高亮聞八九里
雌者聲差下今吳人園囿中及士大夫家皆養之雞鳴
時亦鳴

浮丘伯相鶴經云鶴者陽鳥也而遊於陰因金氣依
火精以自養金數九火數七故稟其純陽也生二年
子毛落而黑毛易三年頂赤為羽翮其七年小變而
飛薄雲漢復七年聲應節而晝夜十二時鳴鳴則中

律百六十年大變而不食生物故大毛落而茸毛生
乃潔白如雪故泥水不能汚或即純黑而緇盡成膏
矣復百六十年變止而雌雄相視目睛不轉則有孕
千六百年形定飲而不食與鸞鳳同羣胎化而產為
仙人之騏驎矣夫聲聞于天故頂赤食於水故喙長
軒於前故後指短棲於陸故足高而尾凋一作周翔於
雲故毛豐而肉疎且大喉以吐故修頸以納新故天
壽不可量所以體無青黃二色者土木之氣內養故

不表於外也是以行必依洲嶼止不集林木蓋羽族
之清崇者也玉策紀曰千載之鶴隨時而鳴能翔于
霄漢其未千載者終不及于漢也其相曰瘦頭朱頂
則冲霄露眼黑睛則遠視隆鼻短喙一作啄則少瞑毳

故解反
又音諧

頰毳

得宅反

耳則知時長頸疎身則能鳴鴻翅

鵠膺則體輕鳳翼雀尾則善飛龜背鼈腹則伏產軒
前垂後則會舞高脰麓節則足力洪髀纖指則好翹
聖人在位則與鳳皇翔于郊甸周易曰鳴鶴在陰其

子和之禽經鶴以聲交而孕張註雄鳴上風雌承下
風則孕又云露翦則露張華註云露禽鶴也古今註
鶴千載變蒼又千載變黑所謂玄鶴也子野鼓琴玄
鶴來舞露下則鶴鳴也鶴之馴養于家庭者飲露則
飛去埤雅鶴性警至八月白露降流于草上點滴有
聲因即高鳴相警移徙所宿處慮有變害也蓋鶴體
潔白舉則高至鳴則遠聞性又善警行必依洲嶼止
不集林木故詩易以為君子言行之象禽經曰鶴以

怨望鵑以貪顧雞以嗔睨鴨以怒瞋雀以猜瞿燕以
狂眈視也鵲以喜轉烏以悲啼鳶以飢鳴鶴以潔唳
梟以凶叫鴟以愁嘯鳴也今鶴雌雄相隨如道士步
斗履其跡而孕內典曰鶴影生禽經曰鶴愛陰而惡
陽雁愛陽而惡陰爾雅翼云鶴一起千里古謂之仙
禽以其於物為壽淮南曰鶴壽千歲以極其遊繁露
曰鶴知夜半鶴水鳥也夜半水位感其生氣則喜而
鳴所以壽者無死氣於中也性好在陰故謂其羽為

陰羽周書曰陰羽鳧旌解者曰鶴鳧羽為旌也禽經
又曰鶴老則聲下而不能高近而不能祭書又言鶴
體無青黃二色者木土之氣內養故不表於外然本
草云鶴有玄有黃有白有蒼玄則鶴之老者百六十
年則有純白純黑若黃鶴古人常言之又多言鵠鵠
即是鶴音之轉後人以鵠名頗著謂鶴之外別有所
謂鵠故埤雅既釋鶴又釋鵠漢昭時黃鵠下建章宮
太液池而歌則名黃鶴神異經鶴國有海鵠衛懿公

好鶴齊王使獻鵠于楚如蕙帳空兮夜鶴怨楚辭黃
鶴一舉及田饒說魯哀公言黃鵠或為鶴或為鵠者
甚多以此知鶴之外無別有所謂鵠也古以鶴為祥
故立之華表說文桓亭郵表也一說漢法亭部四角
建大木貫以方表名曰桓表又鶴之膝特隆故吳矛
戟大者名鶴膝又作詩者以中字平為霍膝通卦驗
云立夏清風至而鶴鳴玉策記云千歲之鶴隨時而
鳴能登木色純白腦盡成骨其未千歲者終不集于

林也本草云穆天子傳曰天子至巨蒐二氏獻白鶴之血以飲天子血主益氣力

余遊焦山遍訪瘞鶴銘杳不可得及過三詔洞之右遇一僧叩之笑指岩下頑石曰在江之涘久為雷神所擊山中人但云霹靂石誰識瘞鶴銘耶因與余猿臂而下幸是時水落石出得盤旋縱觀亂石嵯峨字句分裂不可讀張子厚所謂僅存百三十餘言者今不能留其半矣然其筆法之妙華陽

之名具在擬紀其事以析千古之疑而南村田叟
先獲我心因附錄鶴疏之後以備參考。瘞鶴銘
華陽真逸譔上皇山樵鶴壽不知其紀也壬辰歲
得於華亭甲午歲化於朱方天其未遂吾翔寥廓
耶奚奪之遽也廼裹以玄黃之幣藏茲山之下仙
家無隱我故立石旌事篆銘不朽詞曰相此胎禽
浮丘著經乃徵前事我傳爾銘余欲無言爾其藏
靈雷門去鼓華表留形義惟彷彿事亦微冥爾將

何之解化惟寧後蕩洪流前固重局右割荆門歷
下華亭奚集真侶瘞爾作銘丹陽外仙尉江陰真
宰右刻在鎮江焦山下頑石上潮落方可模相傳
為晉王右軍書惟宋黃睿東觀餘論云為陶隱居
書良是其曰今審定文格字法殊類陶弘景弘景
自號華陽隱居今號真逸者豈其別號歟又其著
真誥但云己卯歲而不著年名其他書亦爾今此
銘壬辰歲甲午歲亦不書年名此又可證云壬辰

歲梁天監十一年也甲午者十三年也按隱居天
監七年東游海嶽權駐會稽永嘉十一年乙未歲
始還茅山其弟子周子良仙去為之作傳即十一
年十三年正在華陽矣後又有題丹陽尉江陰宰
數字當是效陶書故題於石側也王逸少以晉惠
帝大安二年癸亥歲年五十九至穆帝升平五年
辛酉歲卒則成帝咸和九年甲午歲逸少方年二
十三至永和七年辛亥歲年三十八始去會稽閒

居不應二十三歲已自稱真逸也又未官于朝及閒居時不在華陽以是考之決非王右軍書也審矣歐陽文忠公以為不類王右軍法而類顏魯公又疑是顧況云道號同又疑王瓚皆非睿字長孺號雲林子邵武人又董道書跋第六卷載南陽張舉子厚所記云瘞鶴銘今存于焦山凡文章句讀之可識及點畫之僅存者百三十餘言而所亡失幾五十字計其完書蓋九行行之全者二十五字

而首尾不預焉熙寧三年春余索其逸遺于焦山之陰偶得十二字於亂石間石甚迫隘偃卧其下然後可讀故昔人未之見而世不傳其後又有丹陽外仙江陰真宰八字與華陽真逸上皇山樵為似是真侶之號今取其可考者次序之如此又董君自書其後云文忠集古錄謂得六百字今以石校之為行凡十八為字二十五安得字至六百疑書之誤也余于崖上又得唐人詩詩在貞觀中已

列銘後則銘之刻非顧況時可知集古錄豈又并
詩繫之耶君字彥遠號廣川東平人又國朝鄭杓
衍極第二卷論瘞鶴銘而劉有定釋云潤州圖經
以為王羲之書或曰華陽真逸顧況號也蔡君謨
曰瘞鶴文非逸少字東漢末多善書惟隸最盛至
於晉魏之分南北差異鍾王楷法為世所尚元魏
間盡習隸法自隋平陳中國多以楷隸相參瘞鶴
文有隸筆當是隋代書曹士冕曰焦山瘞鶴銘筆

法之妙為書家冠冕前輩慕其字而不知其人最
後雲林子以為華陽隱居為陶弘景及以句曲所
刻隱居朱陽館帖參校然後衆疑釋然其鑒賞可
謂精矣以余考之一本山樵下有書字真宰下有
立石二字一本我傳爾銘作出於上真爾其藏靈
作紀爾歲辰張舉本作丹陽外仙邵亢本作丹陽
仙尉又有作丹陽外仙尉者且中間詞句亦多先
後不同尚俟拏舟過楊子手自模印以稽其得失

之一二可也

宛彼鳴鳩

鵲鳩一名斑鳩似鵲鳩而大鵲鳩灰色無繡項陰則屏
逐其匹晴則呼之語曰天將雨鳩逐婦是也斑鳩項有
繡文斑然今雲南鳥大如鳩而黃啼鳴相呼不同集謂
金鳥或云黃當為鳩聲轉故名移也又云鳴鳩一名爽
又云是鷓

爾雅云鷓鳩鷓鷃邢疏云春秋左傳云鷓鷃氏司事

也杜註云鶻鶻鶻鶻也春來秋去故為司事即此鶻
鶻也舍人曰鶻鶻一名鶻鶻今之斑鶻孫炎曰鶻鶻
一名鳴鶻月令云鳴鶻拂其羽郭云似山鶻而小短
尾青黑色多聲今江東亦呼為鶻鶻按舊說及廣雅
皆云斑鶻非也鄭註云鶻鶻音骨嘲今謂之鸛鵒廣
雅謂為斑鶻誤矣斑鶻鶻鶻也孔疏云毛傳鳴鶻鶻
鶻陸德明曰鶻音骨鶻涉交反字林作鶻云骨鶻小
種鶻也博雅云鶻鶻鶻鶻也本草鶻嘲其鳥南北總

有似鵲尾短黃色在深林間飛翔不遠北人名鸛鵒
爾雅云鵒鵒似鵲鵒鵒似鵲尾短多聲東京賦云鵒
朝春鳴或呼為骨鵒周書時訓云穀雨又五日鳴鵒
拂其羽鳴鵒不拂其羽國不治兵埤雅云鳴鵒一名
鶯鵒莊子所謂蜩與鶯鵒笑之者是也蓋此似山鵒
而小釋鳥曰鶯山鵒也故此一名鶯鵒又其短尾青
黑色多聲故此一名鳴鵒也許慎云鳴鵒奮迅其羽
直刺上飛數千丈入雲中又鵒鵒性食桑葚然過則

醉而傷其性故詩云于嗟鳩兮無食桑甚陸璣云鵲
鳩一名斑鳩蓋斑鳩似鵲鳩而大鵲鳩灰色無繡項
陰則屏逐其匹晴則呼之語曰天將雨鳩逐婦者是
也斑鳩項有繡文斑然故曰斑鳩則與此鵲鳩全異
璣之言非今此鳥喜朝鳴故一曰鵲嘲也凡鳥朝鳴
曰嘲夜鳴曰咬禽經曰林鳥以朝嘲水鳥以夜咬今
林棲多朝鳴水宿多夜叫爾雅翼云鵲鳩春來冬去
備四時之事故少皞以為司事之官詩緝曰鳴鳩鵲

鵬也即氓詩食甚之鳩郊子所謂鵩鳩氏司事莊子所謂鷩鳩也

按陸疏今雲南以下文義支離不相屬而爾雅禽經諸書從未有名爽者若云是鷩則向風搖翅搏逐鳥雀絕非鳩類益明矣又按鳩拙而安鷩鵩剔舌而語師曠辨之甚明而村童牧豎皆能識之何鄭氏李氏認為鷩鵩耶

交交桑扈

桑扈青雀也好竊人脯肉脂及笱中膏故曰竊脂

爾雅桑扈竊脂邢疏桑扈一名竊脂郭註云俗謂之青雀背曲食肉好盜脂膏因名云鄭玄詩箋云竊脂肉食陸璣諸儒說竊脂皆謂盜脂膏即如下云竊玄竊黃者豈復盜竊玄黃乎按下篇釋獸云虎竊毛謂之競貓雕如小熊竊毛而黃竊毛皆謂淺毛竊即古之淺字但此鳥其色不純竊玄淺黑也竊藍淺青也竊黃淺黃也竊丹淺赤也四色皆具則竊脂為淺白

也而諸儒必謂盜竊脂膏者以此經下別云桑扈與竊玄竊黃等竝列則為淺白者也春秋九扈是也此是別一種青雀好竊脂肉目驗而然詩小雅交交桑扈是也且鄭玄郭璞陸璣皆當世名儒無容不知竊為淺義脂為白色而待後人駁正也後人不達此旨妄說異端非也鄭註云按此鳥今謂之蠟背性甚慧可教色微綠其背似蠟言淺有脂色此所謂其背之色也爾雅又云老扈鵠春扈鵠鵠夏扈竊玄秋扈竊

藍冬鴈竊黃桑鴈竊脂棘鴈竊丹行鴈喈喈宵鴈嘖
嘖郭註云老鴈今鷓鴣諸鴈皆因其毛色音聲以為
名邢疏李巡云諸鴈別春夏秋冬四時之名喈喈嘖
嘖鳥聲也按昭十七年左傳云九鴈為九農正以此
八鴈并上老鴈鵠為九賈逵註云春鴈鴈鵠相五土
之宜趣民耕種者也夏鴈竊玄趣民耘苗者也秋鴈
竊藍趣民收斂者也冬鴈竊黃趣民蓋藏者也棘鴈
竊丹為果驅鳥者也行鴈喈喈畫為民驅鳥者也宵

鷹嘖嘖夜為農驅獸者也桑鷹竊脂為蠶驅雀者也
老鷹鵠鵠趣民收麥令不得晏起者也舍人樊光註
爾雅其言亦與賈同其意皆謂以鷹為官還令依此
諸鷹而動作也然則趣民耕耘及收斂蓋藏其事可
得召民使聚而總號令之其為果驅鳥為蠶驅雀豈
得多置官方使之就果樹入蠶室為民驅之哉又晝
驅鳥夜驅獸不可竟日通宵常在田野溥天之下何
以可周且其言不經難可據信也故郭氏及杜預皆

不從也埤雅淮南子曰馬不食脂桑扈不啄粟非廉也桑扈蓋一名而二種釋鳥云桑扈竊脂鴉鵲剖葦此桑扈之一種也蓋對剖葦者言之則竊脂者所謂青質嘴曲食肉好盜脂膏以其性言也對竊丹者言之則竊脂者所謂素質其翅與領皆鶯然而有文章以其色言也左傳曰九扈為九農正賈逵樊光云云說者非之以為入林為果驅鳥入室為蠶驅雀晝驅鳥夜驅獸窮日通宵常在田野非先王所以建官之

意則亦以誤矣蓋九鴈農桑候鳥故先王名官以主
農桑之事取其意云耳非謂依此諸扈使之動作也
竊脂言淺白固其理也且爾雅主詩言之而小雅桑
扈所取者有兩竊脂故爾雅亦兩解也猶之無羊云
九十其牝良耜云殺時牝牡爾雅有黑脣牝又有牛
七尺為牝是也詩紀歐陽氏曰彼桑扈食肉之鳥今
無肉以食則相與羣飛雜亂循場而爭粟有如國人
失其常業而至於窮寡乃相與爭訟而入于岸獄丘

氏曰桑扈肉食者今循人之穀場而食粟喻肉食之貪也

按鳥獸異類而同名者甚多拘儒泥而相駁殊為可笑如夏扈曰竊玄禽經云竊玄曰鵬乃是搏擊之鳥又山海經云嵒有鳥焉如鶚赤身白首其名竊脂絕不相類邢氏謂竊脂為淺白如竊玄竊黃之例頗快人意但郭氏陸氏俱云青雀亦必因其毛色而名得毋與竊藍之秋鴈相混耶若鴝鵒一名剖葦江東人

呼為蘆虎農師亦認為鴈類誤矣

有集維鵠

鵠微小于翟也走而且鳴曰鵠鵠其尾長肉甚美故林慮山下人語曰四足之美有鹿兩足之美有鵠鹿者似鹿而小

爾雅云鵠雉邢疏云鵠雉者郭云即鵠雞也長尾走且鳴說文云長尾雉走鳴乘輦以尾為防鉉著馬頭上山海經女几山其鳥多白鵠埤雅云辭綜曰雉之

健者為鵠尾長六尺字說曰從喬尾長而走且鳴則其首尾喬如也禽經云火為鵠亢為鶴鄭漁仲云鵠雉即鵠雉也青質而有五采者

按雉之類甚多故爾雅列舉其名但首列鵠雉鵠雉鳴雉驚雉郭景純認為四物鄭漁仲認為二物大相矛盾陸農師從郭氏之說亦釋鵠又釋鵠然味下文秩秩海雉鵠山雉似當以鄭說為正

又按嚴氏詩緝引陸疏詳略不同豈宋本與今本相

傳之誤耶因兩存以備參考 鵠是雉中之別名陸
璣曰微小於翟走而且鳴音鵠鵠然其色如雌雉尾
如雉尾而長其頭上有肉冠冠上莖毛長數寸如雄
雉尾角也其肉甚美故林慮山下人語曰四足之美
有鹿兩足之美有鵠鹿者似鹿而小也

鳳皇于飛

鳳雄曰鳳雌曰皇其雛為鸞鸞或曰鳳皇一名鷗非梧
桐不棲非竹實不食非醴泉不飲

大戴禮云羽蟲三百六十鳳皇為之長禽經云鳳雄
凰雌亦曰瑞鷗亦曰鸞鸞羽族之君長也爾雅云鷗
鳳其雌皇邢疏郭云瑞應鳥雞頭蛇頸燕頤龜背魚
尾五彩色高六尺許說文云神鳥也字從鳥凡聲鳳
飛則羣鳥從以萬數故鳳古作朋字山海經曰丹穴
之山有鳥焉其狀如鶴五彩而文名曰鳳首文曰德
翼文曰順背文曰義膺文曰仁腹文曰信飲食自歌
自舞京房易傳曰鳳凰高丈二廣雅云鳳皇雄鳴曰

即即雌鳴曰足足昏鳴曰固常晨鳴曰發明晝鳴曰

保長舉鳴曰上翔集鳴曰歸昌翳鳥鸞鳥鵠鵠鸞鸞

鵠

音古
活切

動

鵠鵠廣昌鵠明鳳皇屬也埤雅云鳳神

鳥俗呼鳥王王文公曰鳳鳥有文河圖有畫非人為

也舊云鳳皇其翼若干其聲若簫不啄生蟲不折生

草不羣居不旅行不罹羅網一說乾臯斷舌則坐歌

孔雀拍尾則立舞人勝之也鸞入夜而歌鳳入朝而

舞天勝之也爾雅曰鸞鳳其雌皇鳳鳥之美者能君

其類雌則美而不大故其雌皇又龍乘雲鳳乘風故
謂之鷩鷩偃也衆鳥偃服焉爾雅翼云韓詩外傳曰
黃帝即位宇內和平惟思鳳象召天老而問之天老
對曰夫鳳象鴻前而麇後蛇頸而魚尾鸛頽而鴛思
龍文而龜背燕頤而雞喙五彩具揚出東方君子之
國翱翔四海之外過崑崙飲底柱濯羽弱水苒宿丹
穴見則天下大安寧又有六象九苞之說鴻前者軒
也麇後者豐也蛇頸者宛也魚尾者岐也鸛頽者椎

也鴛思者張也龍文者繖也龜背者隆也燕頤者方也鷄喙者鈎也六像頭像天者圓也目像日者明也背像月者偃也翼像風者舒也足像地者方也尾像緯者五色具也九苞口包命者不妄鳴也心合度者進退精也耳聰達者居高明也舌詘伸者能變聲也彩色光者文彩呈也冠矩朱者南方行也距銳鈎者武可稱也音激揚者聲遠聞也腹文戶者不妄納也行鳴曰歸嬉止鳴曰提扶夜鳴曰善哉晨鳴曰賀世

飛鳴曰郎都知我者唯黃持竹實來譯其音而附之
聲也黃帝使伶倫制十二筩聽鳳鳴其雄鳴為六雌
鳴亦六比黃鍾之宮而皆可以生之是為律本少皞
氏以其鳴合十二律故設鳳鳥氏之官以為歷正及
帝舜之世作簫以象之故簫韶九成鳳凰來儀禽經
曰翬以鳴鳴鳳凰以儀儀翬儀匹也如衛詩實維我
儀是也南思州北甘山壁立千仞有瀑水飛下猿狖
不能至鳳皇巢其上彼人呼為鳳皇山所食亦蟲魚

遇大風雨或飄墮其雛小者猶如鶴而足差短南人
截取其腎謂之鳳皇杯蔡衡對光武凡鳳有五多赤
色者乃鳳多黃色者鵠雛多青色者鸞多紫色者鸞
驚多白色者鵠禽經亦曰青鳳謂之鵠赤鳳謂之鸞
黃鳳謂之鸞白鳳謂之鸞紫鳳謂之鸞說文亦曰五
方神鳥東方曰發明南方曰焦明西方曰鸞鵠北方
曰幽昌中央曰鳳皇則此五者皆鳳類使不足道不
至為怪祥矣而樂叶圖徵說五鳳皆五色為瑞者一

為孽者四鷖鷖疫之感發明喪之感焦明水之感幽
昌旱之感且既稱為鳳首翼背膺腹文皆合五常豈
應為孽蓋漢儒既夸大其辭推鳳為希世之瑞夸而
無驗極而必反則又推之以為孽反覆無所據皆不
足取也至若漢書云凡五色大鳥似鳳者多羽蟲之
孽是則異鳥之不知名者也遽可鳳之耶淮南子曰
三皇鳳至於庭三代鳳至於澤德彌澆所至彌遠德
彌精所至彌近左傳云鳳鳥氏司歷杜預云鳳知時

故以名厯官禮運云鳳以為畜故鳥不猶元命包云
火離為鳳運斗樞云天樞得則鳳皇翔斗威儀曰君
乘土而王其政太平鳳皇集于林苑樂叶圖徵云五
音克諧各得其倫則鳳皇至動聲儀云鎮星不逆行
則鳳皇至帝王世紀云國安其主好文則鳳皇翔莊
子云鳳帶聖櫻仁左智右賢瑞應圖云鳳皇仁鳥王
者不刳胎剖卵則至

肇允彼桃蟲

桃蟲今鷦鷯是也微小于黃雀其雛化而為鷽故俗語
鷽鷽生鷽

爾雅云桃蟲鷽其雌鷽邢疏舍人曰桃蟲名鷽其雌
名鷽郭云鷽鷽桃雀也俗呼為巧婦此鷽鷽小鳥而
生鷽鷽者也詩周頌云肇允彼桃蟲鄭註云鷽一名
鷽鷽一名鷽鷽一名桃雀俗呼巧婦禽經云鷽巧而
危張註鷽鷽桃雀也狀類黃雀而小燕人謂之巧婦
亦謂之女鷽關東人呼曰巧雀亦謂之巧女喙尖取

茅莠為巢刺以縑麻若紡績為巢或一房或二房懸於蒲葦之上枝折巢敗巧而不知所託孔疏云毛傳桃蟲鷦也鳥之始小終大者箋又言鷦之所為鳥題肩或曰鴉皆惡聲之鳥定本集註皆云或曰鴟惡鳥也按月令季冬云征鳥厲註云征鳥題肩齊人謂之擊征或曰鷹然則題肩是鷹之別名與鴉不類鴉自惡聲之鳥鷹非惡聲不得云皆惡聲之鳥也說文云鷦鷯桃蟲也郭璞云桃蟲巧婦也方言說巧婦之名

自關而東謂之桑飛或謂之工雀或謂之過羸或謂
之女匠自關而西謂之桑飛或謂之韞雀郭璞註云
即鷦鷯是也諸儒皆以鷦為巧婦與題肩又不類也
今箋以鷦與題肩及鴉三者為一其義未詳且言鷦
之為鳥題肩事亦不知所出博雅鷦鷯鷽果羸桑
飛女鷽工雀也埤雅說苑曰鷽鷽巢於葦苕繫之以
髮張華鷽鷽賦云翳蒼蒙籠是焉游集飛不飄揚翔
不翕習巢林不過一枝每食不過數粒

按陸疏鴟鴞一條與鵯鵊甚合故先儒援引多及之
馮氏名物疏已詳辨矣

翩彼飛鴞

鴞大如斑鳩綠色惡聲之鳥也入人家凶賈誼所賦鵩
鳥是也其肉甚美可為羹臠又可為炙漢供御物各隨
其時唯鴞冬夏常施之以其美故也

爾雅臬鴟郭註土臬鄭註訓狐也日暝而夜作賈誼
所賦鵩鳥是也其肉甚美可為羹臠又可為炙漢供

御物說文云梟食母不孝之鳥故冬至捕梟磔之字
從鳥首在木上或說即今伯勞也食母酉陽雜俎云
訓胡惡鳥也鳴則後竅應之禽經怪鵬塞耳張註一
名休鷗廣雅云江東呼為怪鳥聞之多禍人惡之掩
塞耳矣埤雅鴉大如斑鳩綠色所鳴其民有禍證俗
云鴉禍鳥也今謂之畫鳥蓋聲之誤也肉可為炙故
莊子曰見彈而求鴉炙也詩云翩彼飛鴉集於泮林
食我桑黹懷我好音言鴉食桑黹則變而美其色好

其音北山錄曰黃鸝亦食桑黥而音美曹氏曰傳云
桑椹甘甜鴝鵒革響廣志曰鴝楚鳩所生如驢巨虛
種類不孳乳也舊說鴝生三子一為鴝博雅驚鳥鴝
也爾雅翼鵬似鴝不祥鳥夜為惡聲者也賈誼之遷
長沙嘗集其舍自以壽不長作賦自廣然終以不免
按周官翬族氏掌覆天鳥之巢以方書十日十有二
辰十有二月十有二歲二十有八星之號縣其巢上
則去之先儒以為天鳥惡鳴之鳥若鴝鵒日謂從甲

至癸辰謂從子至亥月謂從陬至涂歲謂從攝提格至
赤奮若星謂從角至軫蓋梟鳴鳥噪則嘻嘻出出類
皆驚動人為國怪祥故設官驅之不使惑聽書十日
以下則未曉其理豈歲月日星辰五紀者天鳥所畏
避耶荊州記曰楚人謂之服濮氏曰漢書云霍山家
鵲數鳴楚辭註鵲鵲二物又鵲侶鵲本草云其實一
耳孔氏曰鵲一名梟一名鵲瞻印云為梟為鵲俗說
以為鵲即土鵲非也詩緝鵲怪鵲也鵲也鵲鵲也即

瞻印之為鵠也內則云鵠鵠胖古人尚之胖音判註
云謂脅側薄肉也肅宗張皇后專權每進酒常寘鵠
腦酒鵠腦酒令人久醉健忘嶺表錄異云北方梟人
家以為怪南中晝夜飛鳴與鳥鵠無異桂林人羅取
生鬻之家家養使捕鼠以為勝狸酉陽雜俎云鵠不
飲泉及井水唯遇雨濡翮方得水飲名物疏云爾雅
梟鵠即此惡聲之鳥也梟鵠音相近故孔仲達云鵠
一名梟古書多稱梟鳴指此非土梟也土梟爾雅自

稱之鷓鴣郭註梟鴟云土梟誤矣本草鴉目吞之令
人夜中見物博物志云鴝鵒一名鴝鵒夜目至明今
云吞鴉目而夜中見物似說鴟鴞非鴉矣鴟鴞即爾
雅之怪鴟又云鴝鵒鴟者也本草又云賈誼云鵬似
鴉其實一物考之異物志有鳥如小雉體有文色土
俗因形名之曰服不能遠飛行不出域賈公彥曰鴉
之與鵬二鳥俱夜為惡鳴者是二鳥不可合為一也

陸氏詩疏廣要卷下之上